



## Utekelezaji wa Neno la Mungu

**B**asi kila asikiaye hayo maneno yangu, na kuyafanya, atafananishwa na mtu mwenye akili, aliyejenga nyumba yake juu ya mwamba; ... isianguke; kwa maana misingi yake imewekwa juu ya mwamba.—**Mathayo 7:24, 25.**

Yesu alimalizia mafundisho Yake mlimani kwa kielelezo kilichoonesha kwa uthabiti wenye kustaajabisha umuhimu wa kutekeleza maneno aliyosema. Miongoni mwa umati ambao ulisongamana karibu na Mwokozi kulikuwa na wengi ambao walikuwa wametumia maisha yao karibu na Bahari ya Galilaya. Walipokuwa wameketi kando ya kilima, wakisikiliza maneno ya Kristo, waliweza kuona mabonde na mifereji ya maji ambayo kupitia kwayo vijito vya milimani vilipita kuelekea baharini. Katika majira ya joto vijito hivi mara nyingi vilipotea kabisa, na kuacha tu makorongo makavu na yenye vumbi. Lakini dhoruba za majira ya baridi kali zilipolipuka juu ya vilima, mito ikawa mikali, vijito vikali, na nyakati fulani vilienea mabonde na kubeba kila kitu juu ya mafuriko yao yasiyostahimili.... lakini juu ya vilima nyumba zilijengwa juu ya mwamba. Katika baadhi ya sehemu za nchi kulikuwa na makazi yaliyojengwa kwa miamba kabisa, na nyingine nyingi zilikuwa zimestahimili dhoruba za miaka elfu moja.... Na upepo na mafuriko na tufani vikapiga juu yao bila kuziangusha.

Kama vile waliojenga hizi nyumba zao mwambani, alisema Yesu, ndivyo alivyo yeye ayapokeaye maneno niliyowaambia, na kuyafanya kuwa msingi wa tabia na maisha yake. Karne nyingi hapo awali, nabii Isaya alikuwa ameandika, “Bali neno la Mungu wetu litasimama milele” (Isaya 40:8); na Petro, muda mrefu baada ya Mahubiri ya Mlimani kutolewa, akinukuu maneno haya ya Isaya, aliongeza, “Bali Neno la Bwana hudumu hata milele. Na neno hilo ni neno lile jema lililohubiriwa kwenu” (1 Petro 1:25). Neno la Mungu ndicho kitu pekee cha kuaminiwa ulimwengu ulichopata kujua. Ni msingi thabiti. “Mbingu na nchi zitapita,” alisema Yesu, “bali maneno yangu hayatapita kamwe” (Mathayo 24:35).

Kanuni kuu za sheria, ya asili ya Mungu, zimejumuishwa katika maneno ya Yesu mlimani. Yeyote ajengaye juu ya kanuni hizo anajenga juu ya Kristo, Mwamba wa Zama zote. Katika kulipokea Neno, tunampokea Yesu. Na ni wale tu wanaoyapokea hivyo maneno Yake wanajenga juu Yake. “Maana msingi mwingine hakuna mtu awezaye kuuweka, isipokuwa ni ule uliokwisha kuwekwa, yaani, Yesu Kristo” (1 Wakorintho 3:11). “Wala hakuna wokovu katika mwingine awaye yote, kwa maana hapana jina jingine chini ya mbingu walilopewa wanadamu litupasalo sisi kuokolewa kwalo” (Matendo 4:12). Kristo, aliye Neno, ufunuo wa Mungu—udhihirisho wa tabia Yake, sheria Yake, upendo Wake, uzima Wake—ndiyo msingi pekee ambao juu Yake tunaweza kujenga tabia ambayo itadumu....

Unapoitilia maanani nuru uliyo nayo, nuru kubwa zaidi itakuja. Unajenga juu ya Neno la Mungu, na kisha tabia yako itajengwa kushabihiana na tabia ya Yesu. Kristo, aliye msingi wa kweli, ni jiwe lililo hai; maisha Yake yanatolewa kwa wote ambao wamejengwa juu Yake. “Ninyi nanyi, kama mawe yaliyo hai, mmejengwa mwe nyumba ya Roho” (1 Petro 2:5).... Jengo hilo hakuna tufani itakayoweza kuliangusha (Thoughts from the Mount of Blessing, 147-150).